


Il 14 d'avrel: Sogn Benedetg, pastur e confessur



Sogn Benedetg, dil qual ei vegn plidau oz ei staus pastur da nuorsas en Frontscha damaneivel d'Avignon. El ei naschius igl onn 1165 en ina vischnaunca che senumnava lu Almilar. Cun nov ni diesch onns eis el gia daventaus ierfen, pia senza bab e mumma. Auncallura fuvu el in bien affon e bien giuvenet pastur, ch'ei vivius en tutta innocenta sempladad. Cun 12 onns, ils 13 da settember digl onn 1177 ha Diu favorisau el cun in special clom. Quei di ei il sulegl sestgirentaus ch'il bien pastur ha lundergiu pigliau gronda tema. El fuvu cun sias nuorsas ora sin la pastira e saveva buca tgei pigliar a mauns. Cheu auda el ina vusch che di treis ga: Miu car fegl Benedetg, teidla la vusch da Jesus Cristus! Il giuvenet tema pir che mai, pertgei el udeva a plidar, mo veseva negin.

Havend el udiu per la tiarza ga quella vusch, peglia el curascha e damonda: Tgi eis ti, o signur che plaidas tier mei? Jeu audel tia vusch, mo vesel buca tei! Sinquei ha Cristus sedau d'enconuscher e detg: Buca tema, jeu sun Jesus Cristus il scaffider dil tschiel e dalla tiara: jeu vi che ti teidlies mia vusch! Bien pia, rispunda Benedetg. Tgei cumandeis a mi, o Segner? Cristus di: Jeu vi che ti laschies esser da pertgitar nuorsas e fetschies ina punt sur l'aua dil flum Rodan. Gie, Segner, jeu sai buca bandunar las nuorsas che mia mumma ha schau anavos a mi. Lu sun jeu era buca meister, sai era buca nua che quei flum Rodan fuss e per igl auter, jeu hai mo treis sulets solds daners. Co duei jeu prender a mauns ina tala lavur? Cristus tuorna a dir pli dad ault: Fai quei che jeu camondel e surlai a mi tias nuorsas ed era il rest da tes quitaus. Jeu vi proveder quei che fa basegns e vi dar a ti in cumpogn che muossa la via tiel flum Rodan.

Benedetg secuntenta da suandar il camond da Cristus e sevolva per ir ad encurir il flum Rodan. Cheu cumpara in aungel en la persuna d'in viandont pelegin che serecamonda da vuler esser siu cumpogn da viadi e menar el a Avignon tier il flum Rodan. Suentar treis uras ein ils dus viandonts stai sper la riva dil flum era sch'il viadi fuss atgnamein treis dis lunsch naven da siu vitg Almilar. Cura che Benedetg ha viu quei profund e stermentus lad flum ha el pigliau tema, semanaus encunter siu cumpogn e detg: Co pomai ei quei pusseivel da far ina punt sur quell'aua vi? Buca tema, di igl aungel, quei che para nunpusseivel al carstgaun ei zun maneivel a Diu: quel vegn a dar agid a ti. Va tier il barcariel, fai menar tei sur l'aua vi, va lu el marcau tier igl uestg e lai saver el ed il pievel il camond che ti has survegni da Cristus. Enten plidar quei ei igl aungel staus stulius e Benedetg va cun tutta curascha tier la barca e roga il barcariel da menar el per amur da Jesus e Maria vi sin l'autra riva. Mo il navatur che fuvu in gedi e che veva negina veneraziun tier Jesus e Maria vul buca far quei survetsch senza pagament. Benedetg ha stui dar ad el quels treis sulets solds ch'el veva, per ch'el vegni menaus sur l'aua vi.

Arrivaus da l'autra vart va el tut alla grada el marcau d'Avignon e passa en la baselgia gronda gest da quellas uras ch'igl uestg Ponzius perdegava. Leu amiez il pievel cloma el cun aulta vusch: Tedlei e dei adatg! Jesus Cristus ha tarmess mei cheu per baghegiar ina punt sur quell'aua dil Rodan vi. Ton il pievel sco igl uestg han teniu quei per narradads d'in buob che

vegli disturbar la glieud durant priedi. El ei vegnius menaus giuado tiel president dil marcau che fuva in um che scatschava las narradads cun zacontas bastunadas.

Benedetg stat uss avon il president e di cun vusch affonila: O signur, jeu sun cheu tarmess da Diu per baghegiar ina punt sur il Rodan vi e vai da basegns da vies agid. Il president po buca seretener da rir ed el giudichescha che quei buob seigi stuorns e fetschi mo spass. Co vul ti far ina tala punt senza daners e senza mistregn? Gronds prencis e retgs han aunc mai giu la curascha da prender a mauns ina tala ovra. E tuttina, sche ti vul far in'emprouva, sche vai jeu cheu en mia cuort in detg crap. Quel vi jeu schenghegiar a ti per crap da fundament. Quei crap fuva schi gronds e grevs, che 30 umens vessan strusch pudiu muentar.

Benedetg che fageva buc adatg dil crap, mobein dil plaid da Diu va vitier, fa l'enzenna dalla sontga crusch, metta ils mauns lundervi e pren il crap senza gronda breigia sin siu tgau. Sco sch'ei fuss in sacchet da plemas ha el purtau quei crap tras il marcau entochen tier la riva dil Rodan e tschenta quel en quei liug, nua che la punt duess prender si'entschatta. Tut quei fuva daventau en preschientscha digl uestg, dil president e dil pievel dil marcau che fuva currius neutier per marveglias. Mo tuts clamavan: miracla, miracla dil tutpussent maun da Diu. Il president sez ei sefiers per tiara, bitschau ils peis da quei giuvenet e dau ad el 300 daners d'argien per entscheiver quella gronda construcziun.

Era igl uestg Ponzius, ils signurs e burgheis dil marcau han contribuì schi generusamein che Benedetg ha enteifer duas uras survegniù pli che 5000 daners d'argien ch'eran da quei temps in fetg grond capital. Ladinamein ha el pladiu meisters da mintga sort per construir quella punt. Bia glieud vegneva neutier da libra voluntad per gidar che la lavur mondi vinavon e ch'els sappien guder la sontga conversiun ed ils sabis plaids e cussegls da quei giuven Benedetg che saveva reger e cumandar libramein sur dalla lavur. Diu muentava era il pievel leutier cun schar daventar bia miracles en benefeci dils benefactors; pertgei malsaus, suords, tschocs ed auters mendus vegnevan medegai cun bitschar ils mauns u tucrar la vestgadira da quei sogn pastur. 18 miracles havevan ins saviu dumberar gia igl emprem di.

Cura ch'ei muncava crappa ni caltschina, saveva Benedetg cumandar nua cavar ed ei vegneva adina anflau quei che fuva da basegns. Cura ch'ei muncava daners mava el per Avignon entuorn e clamava: Diu vul che nus fetschien ina punt sur il Rodan vi. Sin quei survegneva el grondas summas daners per cuntinuar la punt fatga tut ord da crap cun 19 artgs tschenta sin pilasters. Siat entirs onns ha sogn Benedetg baghegiu vid quella punt per grond smarvegli dil mund, pertgei il flum fuva lads, profunds e furius. Durant quei temps ha el era construì in spital pils pelegrins che passavan savens cheu speras ora. Sut sia direcziun ha el fundau ina confraternitad, numnada ils confrars dalla punt, che vevan l'obligaziun da survegilar e ver quita per ils basegns da quella ed era per autras lavurs pil generaleesser.

Mo igl inimitg infernal ha sin tuttas modas encuretgh d'imperdir u disfar quella lavur, en la quala ins veseva la buontad e la pussonza da Diu. In di ha il demuni pudiu ruinar in artg, mo auncallaura cun tut ses rampis buca pudiu retener las lavurs. La punt fuva ton sco finida e sogn Benedetg veva pér 19 onns, cura ch'el ha giu ina revelaziun che la fin da sia veta s'avischini. Ina leva malsogna ha levgiu ad el il viadi vi en la perpetnada. Cun gronda devoziun retscheiva il giuven ils sogns Sacraments e metta tutta fidonza en Diu e Nossadunna ch'el ha sia entira veta venerau.

Entochen siu davos mument pronunziava el ils sogns nums Jesus e Maria. Ils 14 d'avrel 1184 ha el rendiu siu spért a Diu. La mort ha caschunau gronda tristezia lunsch entuorn e scadin garegiava da retscheiver beinenqual caussa cun venerar il sogn tgierp. Cun gronda solemnitad eis el vegnius satraus tenor siu giavisch en sia caplutta ch'el veva baghegiu el tierz pilaster dalla punt, nua ch'el veva passentau ed urau biaras uras. Sia fossa fuva tut da crap e leu daventavan di per di miracles cun malsauns da tuttas uisas. Sinquei ha papa Innocenz IV igl onn 1245 sanctificau e canonisau quei benediu pastur e survient da Diu.

Suenter enzacons tschien onns ei la devoziun tier sogn Benedetg sespiarsa ed era la punt vegneva negligida, aschia ch'ella smanatschava da dar ensemen. Perquei ei il sogn tgierp vegnius allontanau ord la caplutta igl onn 1670 e transmessa en ina baselgia dil marcu. Il sogn tgierp fuva intact, frestg e conservau, sco sch'el fuss gest staus morts, schegie ch'el era staus satraus leu 486 onns.

Reflexiun

Diu ha fatg tut quei per dar d'enconuscher sia infinita pussonza e per schar entelgir con plascheivels quels seigien che garegien cun cor sincer da far sia divina voluntad. Cun l'assistenza dalla divina providientscha ha in semper giuven pastur saviu far ina punt che ni imperaturs Romans ni monarcs dalla Frontscha ein stai el cass da far, ni cun lur pussonza ni cun lur scasis. Quella miracla duei destadar nossa cardientscha, confortar nossa speranza e fidonza en Diu ed era animar nossa voluntad d'adurar la divina pussonza e spitgar siu pussent agid en tuts nos basegns. Era sch'igl instrument ei en sesez fleivels, sche daventa el ferm e pussents els mauns da Diu. Croiset. Villeg.